



zail, illun eta gogor egiten du euskeraz. Jaun orrek asko daki noski baiñan gogoan artu gear luke, Radio-edaketak aalik eta atsegingarriena bear dula; ta gaiñera jende geientzako ulertu erreza dedin mintzaera arrunta, garbi eta argian esana, entzule guziak ondo jaso dezaten. Euskeldunok, zoritxarrez euskera bakarra ez degulako, ordun eta arreta aundiagoaz, izkera erreza eta gai errikoienak aukeratu bear dira.

Ni ez nazute kontentagaitza; euskeraz izan ezkeru ezer gutxierekin konpormatzen naizenetakoa baizik.

Alaz guziz mingarri zait eta tamalezkoa Londres'eko B. B. C. bezelako eda-bide azkar eta indartsua gure esku illean bein izan eta ez obeto baliatzen jakitea.

Norentzat diardula uste du ordea, B. B. C. mintzazaile euskaldunak?... Oraingo euskaldunentzat ez beintzat! Entzuleak uxatu nai ditula dirudi-ta.

Ea bada aurrerantzean gure entzuleen iritziak onartzen ditun, eta euskeraz gaurko eguneko neurritz mintzatzan zaigun. Ez motrollo ta zabar; gutxiago ordea ulergaitz eta illun. Bien-arte omen birtutea, au da: poz-jario ta argitasuna.

Onela egingo dulakoan EGAN'ek alde aurretik eskerrak ematen dizkio. Eta txaloak jotzeko irrikitzen dago.

IBALAN

